

Concours de novèlas



1° Lo Lector del Val, Associacion de las Bibliotècas del Sicoval (comunitat d'aglomeracion al sud-èst de Tolosa), organiza son XVIIè concors de novèlas, dobèrt a totis e a gratis, d'octòbre de 2014 a mars de 2015. Compta quatre categories: primàri, segondàri, licèus, adultes. Los tèxts collectius son permès se fan partida de l'ensenhament d'una classa tota.

2° Lo tèxt dèu necessàriament començar amb la frasa seguenta, que serà lo tèma:

« **La bibliotecària sul pic se lo remetèt. Èra lo jovent que manlevava pas que d'obratges d'arqueologia...** » La forma serà la novèla, lo genre demòra liure: fantastic, policièr, sciéncia-ficcion, istoric, romanèsc, aventura, etc... o pas brica de genre que siá. Totas las variantas de la lenga d'Òc son planvengudas. A carga pel participant de passar l'incipit dins sa varianta pròpia.

3° Cada candidat poirà presentar un maximum de dos tèxts, de pas mai de sièis paginas rècto simple (12 000 signes maximum, espacis incluses: a l'entorn de 30 linhas per pagina, interlinha 1.5, tipe de letra classica, còs 12, format 21x29.7). Las cal dactilografiadas e foliadas (levat l'originala). Cal obligatòriament un títol. Solament un tèxt per autor poirà obténer un prèmi.

4° Los tèxts deuran èsser mandats en 6 (categoria adulte) o 4 (categoria jove) còpias de papièr, e una còpia numeric al mai tard lo 23 de fevrièr de 2015, a las adreiças seguentas: Le Lector del Val 10-12 bd des genêts - 31320 Castanet-Tolzan – mèl: info@lecteurduval.org. Se pòdon tanben pausar dins una de las 27 bibliotècas de las comunas del Sicoval fins a aquela data.

5° Lo concors es anonim. Pas de nom o de fals-nom dins lo manuscrit. Tot signe distinctiu menarà a la cancelacion. Un formulari d'inscripcion junt al mandadís aurà lo nom d'ostal, lo pichon nom, l'adreça postala, lo corrièl, l'atge, lo numèro de telefòn e, se ne vira, los ligams de l'establiment escolar e la classa del candidat. I aurà tanben un engatjament de l'autor sul caractari personal, original, e inedit de l'òbra presentada. Pas cap de fals-nom serà acceptat.

6° Los candidats s'engatjan, per la lor signatura, a garantir l'originalitat de las òbras que presentan, si que non poirián èsser acusats de plagiat o contrafaiçon, e ne suportarián solets, las consequéncias. Accèptan que lors tèxts (jos forma perfectament anonima, plan solid) sián propausats a la lectura dins l'encastre de mantunas accions publicas organizadas per l'associacion, e pòscan tanben servir d'espleitacion scientifica dins lo cas d'un encastre associatiu amb lo CNRS.

7° Una jurada presidida per l'escrivan Alem Surre-Garcia e compausada dels bibliotecaris de l'associacion, d'ensenhaires, d'elegits, d'escrivans, de lectors e de professionals del libre, balharà, per categories mantun prèmis en natura (libres, abonaments...) de prene sul luòc, e decidirà dels tèxts d'editar e d'enregistrar: un CD audiò dels milhors tèxts serà fargat.

8° Los ganhants seràn avisats per corrièr individual. La remesa dels prèmis se debanarà lo dissabte 13 de junh de 2015 a la bibliotèca de Pompertuzat, e la remesa dels recuèlhs de novèlas e CD als autors es prevista per octobre de 2015 a Diagora-Labège.

9° La jurada pòt demandar a l'autor de modificacions ortograficas o sintaxicas avans tota publicacion, e incita los autors a utilizar de corregidors informatics. En cas d'edicion, los candidats primats acceptan, sens cap de resèrva, que lo lor tèxt siá publicat per talhons o entièr, papièr e Internet, sens dreches d'autor. Accèptan tanben qu'un autre usatge que siá, a mira non lucrativa, tal coma las bibliotècas publicas o utilizacion pedagogica. Gardan per contre lo drech de far tornar servir lor tèxt (reedicion, etc) amb la resèrva de mencionar lo prèmi del Lector del Val.

10° La participacion al concors implica l'acceptacion totala sens resèrva d'aquel reglament. Los organizators se resèrvan lo drech de modificar o de cancelar se de circonstàncias extèrnas lo necessitavan. La jurada se resèrva lo drech de decernir pas cap de prèmi se jutja que la valor dels tèxts propausats es insufisenta.